



MAISON MÈRE DES SŒURS
MISSIONNAIRES DE L'IMMACULÉE-CONCEPTION
2500, CHÈMIN SAINTE-CATHERINE
CÔTE-DES-NEIGES, MONTREAL, P. Q., CANADA

1873

Siore de doctrine pour paynes

John of St. Louis
part



MAISON MERE DES SOEURS
MISSIONNAIRES DE L'IMMACULEE-CONCEPTION
2000, CHEMIN SAINTE-CATHERINE
COTE-DES-NEIGES MONTREAL, P. Q., CANADA

天主降生一千八百七十三年

上海慈母堂重刊

拯世略說



拯世畧說自敘

余生平。伏念人壽。最遠不過百歲。百歲之
身。豈非有盡。雖聲名籍籍。功業蓋世。總一
時事。要當尋永久安頓處。又念一點靈明。
迴超萬物。斷無與物同生同盡之理。自然
暫謝。神竄永存。更念世間萬事。不由人筭。

意者鬼神司之。然鬼神衆矣。亦自有所從。受命者三教百家。叅悟有年。頗悉梗槩。顧終無真實確當了徹完全之義。使此心可泰然自安者。及覩聖教諸書。始不禁躍然起曰。道在是。道在是。向吾意以爲然者。而今果然也。向吾求之不得其故者。而今乃

得其故也。復獲交大西諸士。益歎德行之
純全。至西士止矣。學問之覈博。至西士止
矣。吾何幸而獲聞茲理耶。先我而生者。幾
許豪傑。貿貿以生。昧昧以死。其間亦有自
號爲了生死者。究竟仍在迷途中也。吾何
幸而獲聞茲理耶。雖

造物主於人無厚薄。在我不可不自諱特恩。
竊用自喜。又用自懼。懼夫既達茲理而不。
全不粹。受責更倍於他人。復思吾身幸識。
此高明之路。豈忍聽有衆之沉淪。故不顧。
世俗拂耳。每每喜向人道也。雖聖教典籍。
百萬。振聳聳聵而有餘。但余小子既受。

造物主多恩。識所能及。口所能言者。何敢不
竭其區區。始也好辯。爲答客問行世。今標

大義數端。曰拯世畧說。大約詳於彼者。則
畧於此。夫造物生民。備之安所。其如陷吾
民者之多也。旣陷之後。亦不自知其爲陷。
而反以拯之者爲非。若然。則雖欲拔之使

出。彼或不肯舉手待援。吾亦如之何哉。

朱宗元述



拯世畧說目錄

學以明確生死爲要

宇宙之內真教惟一

物必返其所本

儒者窺見大原

二氏不知尊主

聖教不可相渾

爲善不可以無所爲

天主性情美好

天地原始

天主必須降生

罪人之功非功

義人之罪微罪

聞教與不聞教者功罪有辨

禍福皆繫上主

死後必有賞罰

賞罰迴別人世

愛仇復仇說

禁妾守貞之訓

追念
先人當循正道

世俗鬼神皆非

氣質所以不齊

聖事寓奧於跡

神功萬不可已

空中自能變化

魔鬼能爲變幻

輕棄世福爲先

受苦爲大吉祥

天地之終有期



拯世畧說

古越朱宗元著

學以明確生死爲要

宇宙之內。以貴賤與生死較。兩者孰重。必曰。殆不侔矣。以貧富與生死較。兩者孰重。必曰。殆不侔矣。以墨者。去賤而求貴。遷有無者。卽富而辭貧。當世必謂大能。獨有人焉。毅然而談生死。則不以迂訕。必以異斥。嗚呼。人孰不愛己者哉。而身生非生。身死非死。美衣食。華居處。則身生以順。多子孫。營墳墓。則身死以

寧。不知此非能愛已者也。愛藏已之器者也。計人靈之處於身也。不猶主人之處于室乎。使有人終日丹楹刻桷。而不恤其飢寒。則必以爲大愚矣。彼勤其身而忘其神者。何異於是。雖有缶器。使置之危而必損。未有不求所以安之者。神靈非缶器也。乃不思所以置之。何哉。涉大海者。知有險阻。必預計舟楫資糧。趨避之事。生死之海。其爲險阻也多矣。乃欲任一葦之所如耶。雖極愚鈍者。慮必及此。稍有明悟。便思身後事大。所以修仙坐禪。多屬高明。然二氏雖亦期徹生

死。不過隨人脚跟。總屬貿昧。毫無把捉。胥歸淪溺耳。譬如適燕趙者。向南而轅。厥志雖猛。而終不可至。何則。其向路差也。夫肉軀之苦樂。爲暫苦樂。性靈之苦樂。爲永苦樂。生前之榮辱。爲僞榮辱。死後之榮辱。爲真榮辱。苟使神靈上陟。此生雖刀鋸鼎鑊。未爲無福。苟其神靈下墜。此生雖安富尊榮。不勝悲苦。然則生死一事。如何重大切要。可漠不尋討。而誤以耽空服氣爲定論哉。總之生死一事。俗儒存而不論。二氏論而不確。存而不論。則理何由明。論而不確。則益以滋

惑。今將求之六經。大旨雖有包蓄。而儒者不知所講。明將求兩藏。抑又渺茫無據。拂理悖情。若是。則將任吾性靈。游移而無定。喪陷而不顧耶。抑將謂一死之後。無知無覺。遂渙散而無所歸着耶。過今不講。將憑此隙駒之歲月。而徐徐以圖耶。嗟夫。欲知器之久近者。必詢諸制器之人。欲知途之遐邇者。必問之已經之士。欲知死生之正道者。必決諸生死之主。吾生也。誰爲賦畀。吾死也。誰爲收取。當其生。非吾欲生也。有授之生者也。當其死。非吾欲死也。有命之死者也。歸

之佛。佛且有生。歸之仙。仙何嘗不死。歸之世俗之鬼神。鬼神自生而死者。皆不能自主。無智無愚。皆曰天生。蒸民要知。非蒼蒼之天生此民。乃蒼蒼之天之主宰。生此民也。既以天之主宰生我。必由天之主宰死我。且處置黜陟我。我又向何處問生死的確之道哉。余故曰。惟天主命人生死之說。爲定論。若夫道家以修煉引年。不識形神貴賤。豈呼吸引導之術。謬謂可得長生也耶。則是琢其形。以汨其神矣。固悖矣。至如釋氏以明心見性。便得成佛。試問此心性。非天主賦。

與之耶。故存心養性所以事主。佛氏非惟不知事主。又欲屈主于其下。而使之事已。源頭旣差。谿徑悉誤。食主之糧。衣主之衣。用主生之口。而言逆主之論。悖更甚矣。而又烏足以得生死之定論哉。

宇宙之內真教惟一

昔余與人言天主之學。有人曰。予最不喜聞者。天主二字。予應之曰。然則吾子極惡聞父母之名乎。生我者父母。生父母者祖宗。生祖宗者天主也。天主非生人之大父母乎。予又與人言天堂地獄之學。有人曰。

纔涉死後。便屬異端。吾儒不道。予應之曰。然則吾子將永生于世乎。孔子言朝聞道夕死。非言身後乎。天下極愚婦寺。仰天地之變化。未有不肅然警懼。謂其中必有主宰者。雖誤以神佛等爲主宰。不過見解習俗所蔽。而其認有主宰一念。則由本來良知。不可泯滅。卽此便爲乾坤有主之証。夫二儀萬類。不能自造。有造之者。恒言所云造物是也。旣謂之物。天地亦物之大者耳。而更有造天地者。以其至尊無匹。謂之上主。以其搏掬萬有。謂之造物。以其主宰群生。謂之天

主。夫天主生成化育。降衷下民。則大父也。臨下有赫。降殃降祥。則共君也。不事君親。世未有不罪之者。而大父共君之恩。百倍其功。卽吾所謂君若親。亦在其煦養鑑觀之下。獨敢棄置不事。豈非不忠罔上。悖理不孝之極者哉。今夫儒者不言死後。以爲未始履其境。未始悉其狀。卽不容以意見所推測。輕置喙以滋惑。此正大爲鄭重。以俟乎得其傳而能言者。非如異端之妄言也。而豈謂可置之不言哉。然則有得其傳者於此。固不容不言已。予之所言。所謂得其傳者也。

余之所傳。不自于人。苟自于人。仍屬意見推測。未免有妄。余之所傳。乃皇皇上主。躬降而命之。聖聖相傳。口口相述者也。上主生天以覆人。生地以載人。生萬物以養人。而豈不立教以訓人乎。吾人戴上主所生之天。履上主所生之地。用上主所生之萬物。而奈何不奉上主所立之教乎。凡設教者。皆欲迥人於善。遠人於惡。而教術多端。悉由人立。人雖聖賢。其于至道。玄微。識見定有所限。所謂及其至。聖人亦有不知者。則其爲教。焉能盡善而無缺陷。惟天主一教。乃上主

降生時。親所指授。至真無謬。至脩無缺。似至淺。實至深。似至簡。實至足。似至易。實至難。舉其概。庸夫亦可以與能而極其微。雖上聖有所不克盡。由之者。可以得真福而免真禍。不由之者。即使絕世文章。彌天事業。與凡辭俗。遯世。却聲色。耽苦空。悉係絕源離根。而不能獲報於主也。或曰。率異教之言而爲善。豈不可以徼上陟乎。曰。夫教猶藥也。藥爲有疾者施。不爲無疾者施。教爲有過者設。不爲無過者設。人性皆受病者。惟昇性之主。乃能知其受病之故。而立教以藥之。

人雖率循他教。而不飲救性之藥。豈能望其瘳哉。故惟天主之教爲真教也。

物必返其所本

天下無無原之水。無無本之枝。天主者。固天地萬物之源本也。造成形軀。賦我靈性。俾明睿尊鉅。超絕萬物。而又預備天堂真福。期人受享。迨至悲憫人世。罪惡深重。甘自隱屈。降生爲人。受難至死。以闢萬民升天之牖。以贖萬世無窮之債。此則上主之全能。全智。全善。殫盡其慈。而慈恩洵莫尚已。夫惟天主愛人之

心。至真至篤。不可復加。吾人受恩于主。至大至普。不可限量。吾儕卽致身致命。猶不足以仰答鴻恩萬一。故一生之精力。當全注於此。而此處昧昧。雖他行俱全。未免爲大闕陷。然則他行可不修乎。蓋思他行如枝。得此一。枝。或失彼一。枝。故貞于色者。未必廉于財。足于仁者。未必全乎義。欽崇天主。若網之有綱。衣之有領。一絜而統體俱振。萬目畢舉矣。未有真心愛主之人。而行不可法。言不可信者。未有真心愛主之人。而事君不忠。事親不孝者。未有真心愛主之人。而臨

財苟取。臨難苟免者。蓋種種善事。皆天主命我爲之。一有不全。則逆天主之命。而不得爲愛主之至矣。故萬善萬德。不過成就其昭事功夫耳。

儒者窺見大原

百家之說紛然。而儒道得尊於世者。百家爭其流。而儒者窺其原也。是故有畏天命之說焉。有顧諟明命之說焉。有敬怒敬渝之說焉。有昭事昭受之說焉。有欽若靈承之說焉。其論道也。則曰。大原出于天。其論德也。首言天命之謂性。卒以天載之無聲無臭爲至。

曰維皇上帝降衷於下民。若有恒性。曰明德者。人之所得乎天。則皆言吾人性靈賦自上主。與異端言。吾心能主張天地者。異矣。曰天地設位。聖人成能。曰用天之道。因地之利。則明知聖人不過于既有天地之後。爲之裁成輔相。與異端言。山河大地。皆心性妙明中所生之物者。異矣。曰天降大任於是人。必先苦其心志。曰天奪其魄。曰天牖其衷。則明言上主有轉移人心之權。與異端言。真性自爲主宰。毫不聽命於主者。異矣。曰獲罪于天無所禱。則明知事物權衡。宰自

上主。百神不得分其職矣。曰下學上達。知我其天。則明知朝夕存想。與主默契之爲闡修矣。曰惡人齋戒沐浴。可事上帝。則明知一切人靈。痛悔自新。俱得奉事天主矣。或以爲昭事之禮。唯天子舉之。諸侯且不敢僭。况庶人乎。不知所云不得僭者。特郊社之禮耳。豈禁人稽首拜禱。疾痛患難之籲而呼也。卽今諸夏之人。凡遇元旦長至。及婚姻一切吉凶之禮。不論貴賤。必先拜天。此豈號爲僭妄。古人趙抃。每夕焚香告天。亦豈以人臣僭擬天子乎。大抵聖賢經史。其精義

多與聖教默合。而後儒詮疏。反多渾淆。如太極生兩儀之謂。試問太極有知覺乎。則必曰無有。太極有靈明乎。則必曰無有。太極能賞罰乎。則必曰不能。故聞祭上帝也。未聞祭太極。聞畏天命矣。未聞畏太極。太極者。最先之謂也。如草木之有種子。人物之有元質。天之所以爲天地。地之所以爲地。是謂天地根。是謂太極。或又曰。生天生地之天主。固與儒者所論無二。若大秦耶穌之降生。恐不可以當上主也。曰。子以端居九重爲天子。巡狩方嶽者。非天子乎。古者天主未降。

但祀無聲無臭之上主。卽如天子端居時耳。方今天
主旣降。則必奉有名有像之耶穌。卽如天子巡狩時
也。故在西漢以前。天主尚未降生。宇內之人。果因性
之本善。恪守其良知良能。其心亦已盡。西漢而後。降
生之主。闡發至義。更立新典。必悉遵其言說。乃爲完
備。聖經所謂新教是也。蓋儒者。知宰制乾坤之天主。
而不知降世代救之天主。知皇矣蕩蕩之真宰。而不
知位三體一之妙性。知燔柴升中之牲享。而不知麩
體酒血之大祭。知悔過遷善之心功。而不知領洗告

解之定禮。此則聖教所備。佐吾儒之不及。爲他日上
升之階梯也。凡吾師法聖賢者。毋汨此窺見大原之
性天也哉。

二氏不知尊主

或謂含生負氣之族。凡戴高者。孰不知天主至尊至
大。豈有覩然具此面目。而敢于侮慢天主者。卽道家
亦奉昊天上帝爲至尊。釋氏亦報天地父母爲四恩。
未必盡背聖教。曰。宇宙自然之理。實有之事。雖非傳
授。固可意悟。所以未聞聖教之人。亦自知乾坤有主。

卽縱恣傲慢。決不言天主不足敬。此正良知之不容
盡昧也。若道家雖名尊天而所以尊之之理實屬不
知。彼旣奉玉皇爲昊天至尊。而又以三清列其上。將
以誰爲主乎。况玉皇乃漢末人。行事無實跡。卽羽流
不盡知。惟林靈素知之。而其封號。則出於宋朝亡國
之君。此誣天主。褻天主。欺天主。可謂尊天主乎。上帝
者。獨貴無偶。如國止一君。家止一長。道家一切神祇。
多以上帝呼之。瀆莫甚于此者。或曰。玉皇人類。不可
以當上帝。固也。彼降生之耶穌。獨非人而天主者乎。

曰。大不侔矣。耶穌降生事跡。有幾千年前知之聖。以
豫論其事。有千餘年之聖跡。以後証其符。有數百萬
之典籍。以發揮其蘊。有幾百萬之賢聖。以弘敷其教。
能使天地神物。咸若其命。能使被其訓者。人心悉良。
風俗盡美。故當耶穌未降。而人懸望。方降。而人景信。
已降。而人願足。道德神奇。証之以萬耳萬目。天功聖
誨。傳之於萬國萬方。豈如漢末張儀。出于道君一夢。
得于術士一請。妄以玉皇名號。追贈於千餘年之後。
哉。至於佛氏妄誕。較之尤甚。按釋典所載。釋迦行成。

坐而受父母之拜。謂道尊故也。夫孝弟者。道之大端也。可屈生我者而使之拜我乎。此則倒行逆施。卽史策所稱亂臣賊子。亦少有爲之者。尙謂其所立之教可從哉。是以道家之於主也。以人竊其號。佛氏之於主也。以人僭其上。竊則不當。僭則不容。皆無合于昭事之旨也。

釋道
聖教不可相渾

或曰。佛之真性。無始無終。惟因救度衆生。現身於西域。此與所稱天主。無始終。無不在。而降生西土以救

世者無異。認己氏曰。彼既稱無始無終。天上地下。惟我獨尊。則是主張萬有之主也。便當名之以天主。不當名之以佛。主者至尊莫尚。獨一無耦之稱。佛則人具此性。比肩衆矣。苟佛可以主張萬有。人人皆有此性。則人人可以主張萬有矣。一國兩諸侯。一國不治。四海兩天子。四海不治。天地兩主。天地不治。而況以多多主乎。且佛既無始。則一切人物之性。宜皆爲彼佛所賦。乃佛書言衆生真性。都是無始遷劫以來。不是佛賦之也。况形骸產于父母。靈性得諸賦畀。亦我

輩中之一輩耳。其稱真性無終始。因救度降世者。悉僭竊天主之似。爲小人無忌憚之語也。可妄混乎聖教哉。若夫聖教言性。必本降衷。佛氏則認爲自有。聖教論物。必分等級。佛氏則混爲一體。聖教則千萬卷書。惟歸一旨。佛氏則教律宗。且分爲三路。聖教兢兢業業。朝夕省察。若鑑若臨。佛家快樂逍遙。倒橫直豎。究竟談空。聖教因其固然。必察由然。精義入神。駸駸上達。佛據現在自然。不究從來。想悟所及。認爲實際。聖教似淺實深。雖凡夫俗子。旦夕講論可通。自此尋

掛世畧論
一
討。奧義愈精。佛法似平實幻。令高明達士。叅解不來。
一明虛妄。懊悔無及。此皆絕不相倫者也。

爲善不可以無所爲

聽其言。高妙而可喜。求之而實不可行者。無所爲而
爲善之一說也。夫無所爲。則滅意矣。大學教人誠意。
亦禁其僞者耳。豈併其意而滅之耶。子曰。視其所以。
觀其所由。旣見其外之善行。悉其起念之若何者。豈
非問其爲善之心。果何所爲哉。故爲善。非但不可以
無所爲。實不能以無所爲耳。而但當于所爲之中。辨

其公私。卽如學問者。惟志在干祿。其志則鄙矣。若欲聰明德性。日進高明。則自屬美意。苟使并此念而去之。又何事學問乎。孝親者。或以之沽名釣譽。或以爲有利于身。此其私願矣。若欲得父母之歡心。與期盡人子之職。則其發願乃正大矣。然欲得歡與盡職。此二念者。獨非所謂爲也哉。故行一事。必有所以行此事之故。制一器。必有所以制此器之意。制釜者。將以爨也。制戈者。將以禦也。農夫力田稼穡。期于有秋。商賈蒙霜犯露。期於幾倍也。故爲善之志。約有五等。動

於利而爲善。與動于名而爲善。所謂醜意汚其善行也。好仁之美而爲仁。好義之美而爲義。此從德美起見者也。以爲善。則加妍于吾性。不善。則加媮于吾性。此從心性起見者也。若最上最美之念。惟在爲天主而爲善。以爲凡吾蒸民秉彝之良。皆由生我之意。一切修爲。皆從惟恐獲罪于主一念起。故愛親亦徵其愛天主。愛君亦徵其愛天主。博施濟衆亦徵其愛天主。克己忍欲亦徵其愛天主。此則心心息息與上主相關通。而爲真主之所欲報也。苟不于此起見。則汎

汎漠漠爲善。亦何與天主事。而天主報之哉。譬如有人于此。爲我而盡心竭力。我則酬之。若爲他人而盡心竭力。吾豈代他人酬乎。故我等教士。但當以愛天主之心。行愛天主之事。一念一言一行。惟期仰翕天主之旨。而美報待其自至。此心從愛天主而發。則其所爲也正矣。若曰我善。則天主且賞我以天堂。否則天主且罰我以地獄。此心從畏天主而發也。畏與愛。高下殊等已。

天主性情美好

萬物不自有。恒受有于天主。天主則自有。而不受有于萬物。萬物不自存。恒賴存于天主。天主則自存。而不賴存于萬物。不始而能始物。不終而能終物。不動而能動物。不變而能變物。其性情之尊貴。爲無窮際之大。其品位之峻絕。爲無窮際之高。其包涵之富有。爲無窮際之廣博。其存駐之無初無末。爲無窮際之久遠。其精微之難測難量。爲無窮際之幽深。盡天下聖人。盡天上天神。假之無量時。相與形容測究。譬如以掌挹大海之流。安能罄其毫末哉。凡物皆有依賴。

聲色臭味。依於形也。識悟慮想。依于靈也。天主則純神自立。德卽其體。用卽其性。而絕無依賴矣。凡物皆有流時。一爲已去之流時。一爲未去之流時。天主則前之無始。都爲現在。後之無終。亦都爲現在。而絕無流時矣。是以物物之性。性性之理。自無始時。皆藏于天主之意中。謂之元則。西文謂之意得亞。與天主純體爲一。後特依此所畜元則。因時授造。故萬物旣受造者。與天主爲二。或有始無終。或有始有終。而所畜元則。永在主性。與其純體。同爲無始無終也。天主外

所顯之作用。欲如是以爲之。則如是以爲之。欲不如是以爲之。卽不如是以爲之。存乎天主之意者也。若其內性之相生相發者。出於不得不然。自然而起。非欲然而作。故有三位焉。第一位曰父。第二位曰子。第三位曰聖神。第一位。明見本性無窮之美好。卽生一肖己之像。與己纖悉不殊。而第二位。已全得父之性以爲子矣。如人對鏡。卽生一像於鏡中。與己若一。但鏡之照爲外照。故像爲虛像。照掩而像藏。天主之照爲內照。故像爲實體。照永不息。像永不滅。而成一對。

已之位焉。但非父任意生子也。如人對鏡。非欲使鏡中有像。明照之下。自不能無像耳。第一第二位相親相愛。卽自無始。發一固結之愛情。而第三位已全得父子之性。以爲聖神矣。如人胸中懷某人。卽恍有某人在某胸中。但人之愛向于外。故思懷所成爲虛物。想止。而想之所成隨滅。天主之愛向於內。故愛之所成爲真有。愛無時已。則愛之所成亦無時已。而爲一對已之位焉。顧非父子任意發聖神也。如人見極美麗之物。不必有心契慕。兩好相值。自不能不樂賞矣。

父之生量已盡於生子。父子之發量已盡於發聖神。故不可復加于三。然父不能遏其照使不生。父子不能遏其愛使不發。故必極于三而止。位雖三而體則一。同能同知同善焉。如體也。光也。暖也。而止成一日。然天主非物可擬也。子雖由父。聖神雖由父子。但其生其發不待俄頃。同爲一無始之真主焉。所謂有原先後。無時先後也。而取人以降生者。第二位子也。凡超性之理。悉屬奧玄。而此一端尤爲奧中之奧。玄中之玄。始之以格致之學。繼之以超性之學。庶畧可明。

悟而幼學者未克明透。但實心信愛。漸求解達可也。

天地原始

凡物之理。皆可意測。惟往古事緒。歷年多少。必待信史相傳。非推測可悉也。易稱伏羲神農。已不能詳其姓氏郡邑。故刪書斷自唐虞。明前此悉茫昧難據矣。宋儒羅泌。乃取子家雜言。及道家之說。彙爲路史。言自開闢至春秋。二百七十萬年。邵子元會運世之說。亦如更生五行。多牽強附會。至佛氏謂恒河一粒沙。爲天地一啓閤。尤屬誕妄。總之不獲其傳。任諸家剽

無根之說耳。但萬國史書無記開闢事者。惟如德亞國存之。自有天地至今順治之甲申。僅六千八百四十四年。中間復遭洪水之厄。洪水已前。人類已繁衍如今日。因其背主逆命。悉淹沒之。僅存大聖諾厄一家八口。自洪水至今。四千八百餘年耳。開闢之距洪水。可二千餘年。中國之有人類。大抵自伏羲始。故一切制度規模。悉肇於此數帝。不然。後世百年之後。制作變遷。已不可紀。豈前此有多多之年。其人悉愚待神農始耕。黃帝始衣哉。夫天主不生天地于無窮之

年。而生于數千載前者。正可知乾坤與民物。皆屬有始。皆屬真主製造。而謙事主耳。若稽主作之序。六日而畢。天主能成萬有于俄頃。而必需之六日者。欲其與後世物以漸成者類。使人知目今之化育。新新不竭。卽向者生天生地之主之力也。其第一日。於靜天。上造九品神。神有順主者。有逆主者。而善惡判。升降定矣。升者謂天神。降者謂魔鬼。六日之後。乃生人類。男女各一。男曰亞當。女曰厄襪。必天地萬物備而生人者。正以示世上種種。皆爲吾人而設。而造物者安

頓吾儕。委曲周至。人當感謝於無窮也。茲時人民未
有。僅生二人者。欲萬古生民。咸知同原而出。相愛如
昆弟也。一男止配一女。不以多女奉一男者。示萬世
夫婦之正道也。元祖之生。處於地堂。無風雨寒暑。無
疾病苦惱。萬物咸順厥命。一切生植。不用人工。自然
蕃茂。一切名理。不待推究。自然洞徹。天主許二人以
能守主命。則永生不死。在世之期已盡。遂升之天域
焉。而并以此福傳之子孫。惟一樹菓。主禁勿食。食之
則世福遂墜。殃起身死。靈亦不能陟本鄉焉。而凡人

類之爲其子孫者。皆傳其罪污也。元祖方命。信魔冀
匹天主。遂食此菓。主乃驅出地堂美麗之域。不許更
入。土生荆棘。咩乃得食。四時不齊。疾病始起。人旣犯
主命。物亦犯人命。猛獸毒蛇。皆能施害。雖本性之美
好不失。而性外所加之美好潤澤。悉奪滅而無存矣。
夫一菓之違。罪逆甚輕。情則至重。信魔言而背主命。
是棄親而崇仇也。食菓覬覦比天主。是僭恣而無忌
也。明告以嚴刑而不顧。是不愛其身。且不愛其子若
孫也。萬類之供其欲者甚多。而不禁一菓之嗜。是以

神靈聽口腹之命也。况天主賜元祖聰明超絕後人。特于無中造此世界。令二人安享。并爲生人鼻祖。此何等恩德。纔受恩時。便爾悖逆。罪焉可逭。然天主於後人。功罪各不相及。而元祖之污。則遺于後人者。主嘗誠之矣。帝王號令。猶在必行。况天主而不自踐其言哉。且欲知祖宗遺殃。猶且見罰如此。則我自作之孽。其罰更何如耶。以小事犯主命。世上之禍。遂與人類相終始。以大事犯主命。地獄之刑。豈不爲無窮無極耶。况人旣爲罪裔。自分與主棄絕。然呼主而必應。

求主而必憐。主之聖愛。于茲益顯。又使人還自念曰。既負此無疆之愆矣。夫誰爲救援余者。則必望真主之我拯而我贖也。彼叛逆者。罪其子孫。原不爲過。而天主則特徵罰而已。但奪性外之諸潤飾。而本性之美好自在。且元祖惟超性智量。迴過後人。故一犯訓。立施降罰。若天主不使原罪相承。仍以初賜原祖之恩賜後人。則後人有犯罪惡益重。當卽施滅絕。而人類或幾不可存矣。夫今人竭志學問。猶有不能通達之理。殫力經營。猶有不能生全之計。微蟲卑畜。力可

殺我。水旱病疴。毫不自由。尙且有傲誕自滿。矜我性爲無始。如佛氏者。使若元祖之時。肆妄當何如耶。然吾人氣稟劣弱。易于趨惡。雖由原罪。而主界本體。正不受蔽。爲善爲惡。仍屬自主。不得委罪于元祖也。

天主必須降生

今世群疑而不決者。莫如耶穌降生一事。在西洋有百萬典籍。以究解此。未及悉譯。莫通玄旨。所謂降生之說。非天主向在天。後乃降生于地也。天主無所不在。當其未降。原在于世。及其既降。亦不離天。特天主

第二位。名稱之曰子。取人之性。與己之性。相締結而爲人。然以尊合卑。謙之甚。下之甚。故曰降生也。且非天主化其性。爲人之性。而成人。亦非耶穌化其人之性。爲天主之性。而成天主。乃耶穌一位。兼有天主與人之兩性。故曰天主降世爲人。蓋無始之天主。一體而函三位。降生之耶穌。三體中特著一位。凡孕而生。幼而壯。被釘而死。死而復活升天者。皆耶穌人性之肉身事也。其天主性。則絕不易不動焉。所謂降生之意。其故雖多。大約有三。一者贖罪。一者敷教。一者立

表。何謂贖罪。一曰原罪。原罪者。性根原有之罪也。昔
元祖。以一人而闢萬世無窮之愆。耶穌以一人而贖
萬世無窮之債。元祖以至賤。悖逆至貴。盡罰人類。不
足以究其罪。耶穌以至貴。代贖至賤。盡赦人罪。不足
以竟其功。首魔據菓樹木。而誘陷元祖。耶穌以十字
木。而戰勝仇魔。蓋人力雖大。功雖多。不足補獲罪天
主之惡。而天主純神聖性。又無從代人受愆。耶穌則
人而天主者。論其爲人。可以代苦受償。論其爲天主。
則又力大功多。天主不直赦人罪。必待耶穌救贖者。

一則示其愛人無已之心。于無可肆赦之中。曲行其挽回矜拔之事。一則示其至公極嚴之義。苟非此代救一節。人類萬無從望宥也。一曰本罪。本罪者。自作之罪也。人犯大辟。心雖哀悔。口雖求免。帝王未有赦之者。然則人既得罪于主。一痛悔而克取宥者。雖本此心。悛改之功。亦吾主功德。有以償補彼債矣。特不知痛悔之人。無緣取償于吾主耳。此所謂贖罪也。何謂敷教。天主當付昇時。命人以種種之善。俾克全其性。使率性而行。自然合道。原不須教。人有不盡性者。

天主乃命聖人施教以訓之耳。如上古諸聖祖大聖
梅瑟暨先知諸聖皆是也。人又侮蔑聖言。不知遵守。
天主不得不躬自降生喻世。于是明示人以爲善之
樂。不善之殃。人物之原始。宇宙之究竟。悔改之門。補
救之法。俾宗徒徧曉萬方。然後向之事魔鬼者。化而
事真主矣。向之淫者。化而貞矣。向之貪者。化而廉矣。
向之暴者。化而仁矣。盡六合之內。沾聖風者。今已十
六。奈我中邦。矜驕自滿。溺于習聞。錮于俗見。猶難速
變耳。此所謂敷教也。何謂立表。天主于人。崇卑懸絕。

何從仰法。惟旣降生。則其言行俱得學焉。故隱其神靈赫奕之威。而獨著貞孝謙忍之德。俾中材皆可做視。聖史四人。各紀其事。訓謂之福音。嗣後聖人聖女。洋溢萬國。皆從學習耶穌而成德。此所謂立表也。所謂降生之事。經成數萬。姑舉其畧。歸于六端。一者降生之地。曰如德亞國之白冷郡。在亞細亞洲與中國同洲天主不降生他國。而必於如德亞者。蓋緣開闢以後。萬國皆失源流。惟此一國。獨認真宗。不爲異端淫祀。又先知聖人。豫言降生之事。筆之于冊。以爲日後符徵者。書

幾百卷。皆存是國。又元祖亞當被驅出地堂之後。亦居此國。而亞當所葬之山。卽耶穌受釘之山也。二者降生之母。如德亞國有聖女瑪利亞。聖王達味之苗裔也。幼志不嫁。以上主命配聖若瑟。雖爲夫婦。俱實童身。主命天神報瑪利亞曰。上主降生。救世之期已至。擇爾爲母。瑪利亞以爲矢絕人道。從何得孕。神言此天主神功耳。豈特受孕不須人道。卽分娩亦不損爾初體。瑪利亞始允諾。卽受孕九月而生。一如天神所報。時漢哀帝元壽二年。冬至後四日之夜分也。夫

天主何不從空降世。乃必生于人者。正欲示其愛人之心。與吾人類相關通。然不感而孕。則又特異于人。而表真天主矣。三者降生之祥。時如德亞有司教士。曰匝加利亞。其妻曰意撒伯。皆有聖德。年各七十有奇。而無子。一日方祭。忽天神報曰。爾今將產一子。爲降生之主前驅。意撒伯果孕。遂舉一子。先耶穌六月而生。卽大聖若翰。呼人認主者也。耶穌生時。異光滿室。神報牧羊之童。皆來致敬。天生景星。外國三君。並精曆法。一見此星。謂非天體。素有忽憶經言。真主降

世景宿告祥。以爲此必其驗也。三國相去各千里。不期而俱望星以走。十三日抵如德亞星至降生之地。卽止。三王因就朝焉。及耶穌行世。救民聖蹟。不可枚舉。如命死者生。喑者言。瞽者明。聾者聰。跛者走。病者瘳。狂者醒。巨浪雄風。命息卽息。天地百神。咸聽其命。前此惑人魔像。盡成齏粉。種種神奇。載之聖史。四者降生受難之事。耶穌在世三十三年。人半服其神跡。仰其聖行。惟司教者傲滿。不察耶穌之時與事。與古經相合。謂以人而僭稱天主。殆妄者也。謀殺之。而耶

蘇因之以成大功。遂聽彼加害焉。故預告其徒曰。吾將爲萬民受死。然汝儕勿憂。吾死三日。則復活與汝相見也。一夕禱于山園。更念我受如是大苦。人猶有不能感動信從。至于下墮者。悲痛至極。徧身汗血。深夜惡徒引衆執之。遂以堅繩毒鞭。體裂血流。又織棘爲冠。以加其首。後乃以巨木製十字架。逼耶穌自負之而往。至加瓦略山而釘焉。在十字架。凡三時而死。時春分旣望。日月相對。不宜薄蝕。乃日忽失光。宇宙晦冥。全地大震。山陵崩裂。塚墓忽開。聖人之已去世。

者。多出見于世。惡黨見此異災。亦有自悟其非。思改悔者。而耶穌已葬之後。踰二日。果復活也。處世復四十日。詳定教規。然後于方午上升焉。或疑耶穌受難。出于天主樂爲。則殺耶穌者。無罪乎。不知有人侮我。我雖甘心忍耐。但非我教被侮也。忍受者。雖成在已。含忍之德。而肆侮者。烏得云無罪乎。五者。升天之後。竒跡。如天主聖神降臨。宗徒皆頓明奧理。不待學習。能講萬方之言。敷教天下。其升天處。耶穌足跡恒著山巔。宛如鐫刻。後有聖后赫肋納。敕建聖堂。穹窿合

頂正對足跡處。工竣以大石覆頂。頂不受覆。其頂遂恒露不覆焉。六者。十字架之神威。此架既爲天主受難救世之具。遂付之以大能力。有用之以驅魔逐魅。而無數妖氛立見消滅者矣。有用之以拯疾救疴。而風恙沉災。旋得痊愈者矣。有用之以禦寇應敵。而百萬雄師。俯首順命者矣。有用之以扶危濟患。而風濤火獸。立見解脫者矣。有用之以克己遏欲。而邪念穢想。忽致清淨者矣。非特天主所釘之架。有此奇妙。卽肖其形而製之者。概多神跡。此可想天主之慈威。畢

注于此也。况萬惡之成。多由忿躁。萬德之成。率由含忍。忍其大者。則小者無不可忍而德成也。故耶穌甘受毒釘之大忍。示萬世堅忍之則。况天主造萬有。本欲人觀感。不背主恩。人反認物為主。而用所造之物。爲叛主之具。不然。則或視爲當然固然。曾不知恩所自出。天主憫之。以爲民愆重。旣不可苟赦。又不忍盡罰。乃不惜現身以代負其債。而萬苦萬刑。甘受不辭。此一事者。天主愛人到至極處。猶頑不知感。則真無辭于永罰矣。故宗徒傳教。遇暴君惡吏之虐。惟念天

主爲人。且不惜死。吾何不以死報主乎。于是刀俎鼎烹。不避不屈。反深幸爲主而受此。當聖教初行。三百年內。爲事主堅忍。被殺身者。不知幾千萬億。而愈殺愈堅。愈禁愈熾也。若據世俗之見。必謂巍巍上主。斷不降生。卽降生亦必輝煌袞冕。奚至受難受辱。是烏足以測造物之玄旨哉。

罪人之功非功

所謂罪人。教外不認真主之人。與被教之士。有所過犯。而未經悔解者也。不認主者。或有他善矣。未悔解

者。或有後善矣。然既負罪于身。便爲真主厭惡。特上主無量仁慈。不遽絕滅。久容以俟其悛改也。譬如脾胃一敗。海陸珍錯。俱無益于血氣。如實漏卮者。旋注而旋洩也。又如一體之間。苟有大毒。則全身與之俱斃矣。蓋善必居其全。乃可受賞。惡有其一。已足被罰。如國家法律。死罪數十條。豈必盡犯。苟陷其一。遂可致辟矣。而士師于人。負重辟者。豈曰其人他有善行。而釋之乎。但在國法。雖悔不赦。在教法。圖改便免耳。故經云。有此愛主之德。而作者。雖微易事。必得天上

無窮之報。苟無愛主之德而作者。雖艱大事。必不可望天上之報。今有素不爲惡。徒恃此無根無據之善。自謂可得天福。則萬萬必無之理。蓋一疾在身。則血脉不關通。必滌除以去之。未去其疾。雖甘旨。悉無補于身矣。有罪在我。亦與天主不關通。必洗解以達之。未達于主。其德行。悉無償于後矣。或曰。聖教純修之士。其德行固高不可尙。其尋常寡過之人。視古所稱名賢豪傑。行事竒偉卓犖者。十不逮一。然論升天。則尋常寡過者。可以萬全。竒偉卓犖者。反無把柄。恐與

人之德不相準也。答曰。有其善。喪厥善。聖教爲功。全在隱藏而不露。子僅目之爲尋常寡過者。安知非闇然內裕也。然縱使真不如竒偉卓犖之人。則亦有說。蓋吾人升天。不恃自己善狀。而恃耶穌救贖之績。但以吾善爲往取之價。故救贖之功。譬則食也。善譬則金銀也。千金之子。可以不死者。非金銀足以療饑也。謂貿易便也。若有種種善業。而不爲天主用。譬如擁貲巨萬。不以之買食。彼善雖小。由愛主之心而起。譬如百有百金者。專用以易粟。則巨萬者。必饑而死。而百

金者得食以生也。夫駕巨舫者。極力搖蕩。不過數武。乘流揚帆。則一日千里者。托于風也。竭蹶奔走。百里而疲。乘騏驥綠耳。則周四極者。托于馬也。雖有多力疾足之人。徒涉不可以越江河。跛者有乘則過焉。托于舟也。善蹟雖微。而獲天樂者。托于主也。彼不知所托者。雖勞亦奚益哉。

義人之罪微罪

所謂義人者。信愛天主。被服其教。時省時悔。時解時補。不使罪積于躬者也。此等之人。兢兢自持。大過恒

鮮。然偶陷落。則一念之疵。一言之失。一行之尤。時或有之。而人遂非之曰。此亦有罪人也。罪若當罰。彼且蒙罰也。罪若獲赦。我亦獲赦也。是烏知其不可同日語哉。彼人有愆。不悔省。而義人者。有愆。卽悔。力求去之。譬如鏡然。雖同受塵障。然一者時時刮垢而磨瑩之。一者任其昏而不顧。受蔽雖同。而後之明暗。必有判矣。今夫器之貯油者。積垢四面。投之于火。則旋焉光潔。義人愛主熱心。若火熾烈。雖有小疵。如微塵入熾鼎。無不消滅者矣。衣或垢穢。濯之以江漢。無染不

去。告解之功。亦滌罪之澄淵也。故經曰。時雨自天降地。以樂農心。罪人之淚。自地戾天。以樂主心。彼朝夕嘆息。涕泣于主前。以祈宥者。固吾心之時雨也。世乃有言奉教之士。或恃有告解一路。隨犯隨解。而復隨犯。且奈何。此亦不思之甚也。夫告解去罪。猶藥去疾也。有疾雖可藥愈。而無疾不尤益乎。然人身萬不能以無疾。故爲劑治之方。人心萬不能以無過。故立告解之禮。若曰。告解爲易陷之招。豈方藥爲得疾之媒哉。一罪在身。已經痛告。主雖免其永罰。亦恐入煉罪

之獄。以鍛其渣滓。此處之刑。與永火之慘毒無異。所異者有盡耳。過大與多者。其煉久。過小與寡者。其煉速。總之上主報人。纖息必究。怙終則永罰。悔改則暫刑。惟無過純善之人。乃能直升天域。不然。則勞績美功。亦可補償煉苦。補之不足。則入煉耳。故告解一條。乃于既落之後。爲幹旋之法。非于未陷之前。先開苟且之門。且不徒爲善惡相渾者。啓其便。并爲百密一疎者。補其隙。聖經云。義人失陷。七次。義人尚且如是。則下此者。小過時。時不免也。小過不除。終爲上達之

累必解而去之。方能誕登天國。固無疑者。然則元惡巨憝。卽悔亦可以得赦乎。數犯數悔而亦可數赦乎。夫罪雖大。如果真悔。必蒙赦宥。此天主一定之律也。但惡極罪大者。心志迷惑。罕能知悔。設有此等之人。如古之窮竒禱机。莽操懿溫。盜跖秦檜等。果能悔過。亦可蒙赦。升天然克悔。則必追恨無極。猛勵前進。反勝于平日自稱無過之人。數悔數犯。斷不其然。所慮時解而時不能絕者。日用言念之間。少差違耳。然人奉教以後。視過反多于奉教以前。蓋前此冥冥昧昧。

不省不察。有非莫覺。今則考核甚嚴。細微畢現。知過正聖功也。若夫世俗之士。作一不善。亦有心生懊悔者。而此情不爲天主發。則亦何益之有。又往往絕大重罪。習俗相仍。不以爲非。漫不知悔。斷不克蒙赦于主也。

聞教與不聞教者功罪有辨

客有獻疑于予者曰。據吾子所說。則雖廉如伯夷。忠如龍比。孝如曾參。信如季路。不幸而不沾洗滌之德。澤不免爲下墮之人。而靡所不爲之士。一經悔洗。反

可上升。天主之賞罰。恐不如是失公也。余應之曰。惡人而知悔改。視素不爲惡者。更爲難遇。譬如得已失之物者然。今有兩子于此。其一聰明正直。處置世務。皆極停妥。但終身不認父母。其一子生平狂悖。忽改絃易轍。依依父母之傍。則父母所愛。將誰屬耶。昔天主降生時。一學士有德者。與一不肖同入主堂。學士祝曰。謝主之異我於衆人也。衆人皆淫而我獨貞兮。衆人皆貪而我獨廉兮。衆人皆哺啜而我獨齋克兮。不肖者聞之。惶悚戰栗。不知所爲。不敢仰視。跪伏涕

泣。求主宥其夙非。耶穌謂宗徒曰。夫夫也。入時潔。出時污矣。彼人者。入時污。出時潔矣。一原有善。以矜善而喪善。一原有惡。以悔惡而滅惡。彼學士者。原知謝主。但以滿恃。遂爲上主所棄。况久昧真宗。徒矜已善者乎。故世所稱爲完善之人有三。一不認主者。二認主而未聞教者。三認主聞教而不肯守者。故畧言之。一若人縱有忠孝廉潔之行。然于乾坤之有主宰。爲人之大本大原則茫然不究。是人也。如四肢百體雖美。但少一頭。則世人之君子。天主之小人。必有不認

主之罰矣。一。人無不善之行。雖耳不聞聖教之奧。口不言天主之名。而心則明見乾坤有主。掌賞罰之權。常存敬畏而昭事之。此不幸阻于無傳。而于超性之義未達。然因性之善未失也。如世而果有此成人君子乎。則主曰。閔斯。必默爲之牖。啟其未達之義。錄于永賞之列。此認主而未聞教者也。三。人無惡行。又知認主。且聞耶穌所立之教。而傲然自是曰。彼所謂天主者。吾已尊而事之矣。彼所謂七克十誡者。吾亦且兢兢守之矣。何以洗滌爲。何以耶穌之教爲。則悖逆

彌甚。主所棄絕。昔如德亞國之人。皆素事真主者。惟因不認耶穌爲天主。不肯服其新命。主遂命敵人滅其國。毀其城。殺其人民。幸得脫者。流徙他方。爲丐爲傭焉。夫世上之罰。猶如此。則地獄之永刑。何如耶。由此斷之。認主聞教而不守者。不如認主未聞教之聖賢也。目今不進教之達士。恃己自盈。決難逃乎永墮。客又進于予曰。據聖教臨死一刻。尚可痛改。過此則無及矣。故大善之人。少此一悔。必邀冥罰。有此一悔。必得上登。彼善人因負不認主之罪。但一刻之間。分

升降。而置其前行不較。不幾寬于惡人。負于善人乎。
曰。善始不如善終。故曰蓋棺始定。亦於末路見人品
也。然吾人吃緊。專在死候。朝夕新求上主。亦冀于此
處提攜。緣此時聰明昏眊。神情竦烈。未免悞淪魔誘。
生平日習于善之士。猶懷此懼。况一生作惡。臨死乃
克悔乎。萬一能如此。最爲難得。嗚呼。少壯迄老。滋行
不義。期於頽死之頃。蓋厥前愆。不大危乎。所謂臨死
一刻。尚可悔改者。特欲廣惡人遷善之路。使毋自棄
耳。若人不知真主。不論他事臧否。同爲天主所惡。就

其初而言。善人之污少。惡人之污多。乃善人以無末日之一洗。而少污永存。惡人以有末日之一洗。而多污併去。則于此時衡較。自洗者潔。而不洗者污也。上主升之墜之。至公至當。豈負于善。豈寬于惡者乎。譬如兩人同疾。一甚危。一不甚危。但甚危者。求藥以治。不甚危者。委之不顧。則危甚者。反可得生。而不甚危者。反不免于死也。若已奉聖教而惡如故。天主謂之大辱名教之人。其罰倍重於教外之惡者。

禍福皆係上主

世人皆天主所生。則皆天主所愛也。愛豈有偏屬哉。乃富貴通塞。迥然不齊。并有君子蒙禍。小人獲福者。天主爲之耶。抑人爲之耶。抑如佛言。今世所受。爲前生之因耶。解之曰。天主之禍福人。也。必無有不符其實者矣。但人之善善惡惡。人自不得而知。其被禍被福也。非可以世法按也。且夫天主之公。無微不賞。無細不懲。今有善多而惡少者。大約先報之以禍。而使其永享天堂之樂。有惡多而善少者。大約先報之以福。而使其永受地獄之苦。且世上之事。半任人自爲。

半由天主默限。有人謀之而竟得者。此任人自爲者矣。然而未始非天主所許也。有人謀雖善。而竟不得者。此由主默限者也。然而未始非天主所愛也。抑有經營而得富貴者。適值天主之所許也。不然。雖才智不能強邀利達。若曰。夫人也。不應處富貴也。然天主必有所以篤厚此人。之故。總之審判之日。根由悉露。始知造物處置。最當最巧。且世上報應。雖不可以意量。未始不可以類推。試觀積善之家。恒有餘慶。積不善之家。恒有餘殃。敦實厚重者。爲凝承福履之器。輕

薄儂佻者。且以殺其身而有餘。如此者十之六七。豈
報應竟渺茫哉。况世俗之見。以利順爲大慶。以坎坷
爲至辱。若天主所輕重。不盡在世福世禍。卑窘而善。
上主重之。更甚于崇高之士。亨利而惡。上主惡之。更
甚于藍縷之子。總之美麗福澤。欲人忻謝。而感激以
報主。災禍險阻。欲人忍受。而磨勵其德性。此兩途者。
天主用之以玉成人類之具。猶寒暑之不可廢一也。
特人有善承與不善承耳。善承者。當其得意。則以爲
造物之恩我。而勉建美績。惟力是視。當其失意。則以

爲造物之煉我。而安意忍受。不怯不求。不善承者。當其得意。則驕奢淫佚。日積惡緣。當其失意。則怨天尤人。無所不至。故世上參差不齊之事。正區別人品之大衡鑑也。若據異端因果之論。則前身爲善爲惡。今身受福受殃。不報其爲之者。而報其未始爲之者。拂理逆情。莫大于茲說。至於水旱疾病之災。冤抑枉窒之事。人有竭誠祈禱。籲呼于土木邪神之前。而偶得拯救。得昭雪者。非彼神之靈也。緣人雖忘棄天主。天主猶或憫之。雖誤祈邪鬼。弗較也。然而終爲天主所

棄絕者多矣。甚至大荒大疫。則皆天主假此以刑戮不肖。警戒善人者也。

死後必有賞罰

入其居。視其所置。前有宗廟。後有寢室。倉庫在左。車廐在右。不問而知其爲家也。已。入其居。視其所置。外無廩積。內無寢廟。日用之具。聊且畧陳。不問而知其爲旅也。已。試觀茫茫世界。家耶。旅耶。佳景物。美田宅。好妻子。我所甚繫戀者。誰能久處此耶。死期旣至。大智極勇。能緩之須臾耶。一切世物。誰非借而用之者。

久則還主人耳。不見數畝之宮。百年之內。更迭而處者。且數姓耶。乾坤之內。雖欲不謂之旅。而不可得已。第人爲萬物之靈。生爲逆旅。死有所歸。旅時功罪。歸則分明。若謂至德之聖。極惡之流。同歸一域。有是理乎。是知死後之必有賞罰也。世之操賞罰者。君也。一國之內。其爲君之所賞罰者。特千百之一二耳。一人之身。其所賞罰之事。又特千百之一二耳。故欲以世賞遍善。則有道之時。祿爵不足以答有德。欲以世罰遍惡。則無道之時。囹圄不足以容多奸也。書曰。惟上

帝不常。作善降之百祥。作不善降之百殃。殃祥兼生。前死後之賞罰。現世不足以盡之也。今必曰。富貴福澤。爲善徵乎。則是必爲善人之所好也。然達人志士。且有棄之而不居者焉。今必曰。剖肝碎首。爲惡報乎。是必爲善人之所畏也。然忠臣義士。且有殺身成仁。致命遂志者焉。是知死後之必有賞罰矣。絕德酌以公孤。以後之德。更何以報。殺人者死。而劇盜巨憝。殺百千萬命者。一身之死。曷足以償。是知死後之必有賞罰矣。曹馬之奸。刃未推胸。而子孫有爲帝者。逢干

之忠。腦已塗地。而其後亦竟泯泯。天主寧或非耶。是知死後之必有賞罰矣。聖帝明王。雖九五崇高。善業猶在。作奸犯法。雖粉身碎骨。惡跡仍存。斷不以肉軀之禍福。能消神靈之善惡者也。是知死後之必有賞罰矣。世上之予奪。視在形迹。天主之禍福。注在心神。人犯刑辟。雖悔恨願改。帝王未有赦之者。而天主則無不赦。人無惡行。雖中心具無數惡想。卽有措諸行爲。而人不及覺。帝王未有罪之者。而天主則無不罪。仁義忠信。先澤其性。後澤其形。貪詐淫虐。先污其心。

後污其體。世苦世樂。特身受之耳。心性不與也。豈有神靈爲良爲醜。徒使形骸食報乎。是知死後之必有賞罰矣。或曰。賞罰之說。爲庸下人設也。上智則否。曰。虞廷二十二人。皆聖賢也。乃云三載考績。黜陟幽明。胡以賞罰之于上智也。更嚴。豈專爲庸下人設乎。是知死後之必有賞罰矣。

賞罰迴別人世

可以言言。非天堂之况。可以語語。非地獄之景。蓋二者之苦樂。迴異人世矣。大約地獄之苦有二。一爲覺

苦。一爲失苦。覺苦者。所被之焚灼。所觸之臭穢。所嘗種種之痛楚。是也。失苦者。永失見天主之望。此念所注。摧肝裂肺。過于千百矛盾之交。而又暴火烹煉其形神。此火烈厲無儔。以世上之火視之。猶畫火之視真火也。獄中之掌戮。卽鬼魔。其力甚大。其妬恨我人類甚深。凡可以加虐者。必盡其力。其間同苦之人。雖多。絕無相寬慰者。卽生平父子兄弟。至是亦如仇敵。而相賊害。蓋痛極所迫也。故地獄之火。最爲慘毒。最爲酷烈。使可緩其一息。雖盡受地上諸苦。以易之。甚

所甘心。故在此者。度一刻。如度萬年。而又無他冀望。惟冀天主速銷滅已。而卒不可得。其所在地之中心。昏冥無光。極爲迫窄。偶有隙明。惟見厲鬼妖威。及諸苦態惡狀。古聖人云。地獄之事。使人略見其萬分之一。必立時驚悸以死。彼刻刻親嘗其況者。又何如耶。蓋雖千喙齊號。不足鳴其斯須之苦。總之論罪之重。則罰有輕重。但最輕者。亦踰于世上之酷刑也。人在世時。雖大惡人。真心籲主。主未有不怜之者。至此則爲所棄絕。哀號徹天。曾不足動主之憫焉。此苦乃無

終之殃也。天堂福有二。曰外慶。曰內慶。內慶者。神靈之慶。外慶者。肉身復活之慶。總歸四端。一者。堅好四體百骸。諸苦不侵。火不灼。水不濡。刀兵不害也。一者。身光萬倍于旭日。一者。神快。不疾而速。不行而至。一者。無碍。凡金石之物。皆能直越之也。昔人云。人生三世。母腹爲一世。此世爲一世。天堂爲一世。以今世界視天堂。猶以母腹視今世也。其廣大可知矣。天國之福。雖有大小。但各滿其量。無冀於外。如人穿衣。雖有長短。各稱其體。而俱適也。昔聖若翰。天主賜以神目。

俾略見天堂之樂。若翰曰。目之所未覩。耳之所未聞。口之所不能形容也。彼外景如此。况內景乎。總之天堂地獄之二景。最利害。最真實。又最迫近。慎毋耽目前之計。不慮永遠。或恃空空之論。任其淪墜也。

愛仇復仇說

犯而不校。橫逆自反。洵成德之粹語也。且天主垂訓。寧人負我。毋我負人。寧有不計之怨。毋有或遺之德。而甘受屈抑于世者。必大蒙振拔于天也。或見七克申。有子被殺。母反縱其仇者。遂疑聖教同異端之寬。

親平等。不知史冊載及此事。以見如此大仇。尚且忍得。彼小怨而終日介介者。何慘刻之甚也。且人之被殺。未有無因。如有罪而被殺。似不必圖報。使無罪而被殺。不特國法有三章之約。更難逃天主之刑威也。何必爲私自復仇之舉哉。或曰。春秋大復仇。獨不曰。春秋嘉釋怨乎。且不事復仇。總由愛天主之情而發。彼人終日獲罪于主。主猶愛之而不加滅。彼獲罪于我之事。較之獲罪于主者。不啻萬之一。奈何欲必反乎。雖爲我之所仇。尚爲主之所愛。經曰。如我亦免負

我債者。吾時時負罪債于主。猶求主之矜宥。他人偶一負我。遂至不能釋乎。故吾主有言。我于人罪一一而較不置者。天主于我罪亦一一鞠治而不赦也。大約居上者貴盡法。平等者貴含忍。有忍乃有濟。有容德乃大。以德報怨。雖曰無以報德。而寬深之仁。亦不失爲君子。宣尼豈無所取而言之歟。奈何今之人。侈言不共天。不反兵。竟不捫心于平日。事親事兄之道。何如。甚至真有仇不共戴。義不反兵者。或爲權勢所撓。或爲阿堵所誘。未有不甘爲共天。欣然反兵者矣。

何獨至於天主救人而疑之哉。可慨也夫。

禁妾守貞之訓

有以不娶妾之說語余者。謂若是則釐降二女。亦吾子之所深斥歟。曰。奚止於舜。凡古之侯王。固有一娶九女。一娶十二女之禮矣。然天下之事。有不待教而知其罪者。如殺人貪淫之類是也。但耶穌未降。未有明訓。既有明訓。則斷斷不可犯矣。或以爲無後不孝奈何。不知得子與否。不在有妾無妾。縱使必因妾得。亦所謂得之不以其道也。得子猶在位也。君子未嘗

不欲仕也。又惡不由其道。况聖賢者循性者也。循性者之訓不可違。况天主自立之訓哉。追原始造人類。一夫一婦。允合情理之中。後人淫願太奢。強借無後之說。以肆其淫惡耳。甚至有棄正耦而愛嬖倖。遠家室而比頑童。此上主所痛惡。而舉世習之。不以爲非。何耶。若西土之守貞不娶。不特奉天主之訓。其關係于天下生死安危亦大矣。絕一身最難絕之欲。以救萬民不可窮之災。一者司大祭。非守貞不能。耶穌以其慘難。仰獻大父。以消威怒。以激矜憐。下民有罪。得

不遽罰。每日彌撒之禮。司祭代耶穌獻也。無守貞則無祭禮。上主震怒。降殃速矣。一者聽解罪惡。非守貞不能。人雖修持甚密。而不有大過。必有小疵。縱免行慝。或得心違。必告解始脫。無守貞則無聽解。而人俱爲下墜之品矣。一者遠游敷教。非守貞不能。婚娶之人。上顧父母。下顧妻子。自然不容離家。則四方之人。誰從聞天主聖誨。改非易俗。而升天國乎。一者耐習大勞。非守貞不能。凡司教者。視民如子。一有疾病瀕危。不問風雨晝夜。寒暑遠近。竭疲以赴。或游他方。經

奇險狂濤。過赤道之炎熱。人物俱腐。經北極之嚴冷。半載冰舟。非真元不鑿之人。概不敢冒此苦矣。一者通徹奧理。非守貞不能。性天二字。義極玄微。昏人聰明。莫如女色。自二十迄三十餘。又嗜欲更熾之年。學習工夫。正在其際。一經娶妻。不惟明悟易昏。理不能達。而早暮構思。殫精竭神。亦且身邀短折。故博學大智。十七皆不娶之士焉。若乃性孤僻而不婚。沽名譽而不肯婚。或異端滅倫而不敢婚。皆明拂造物主生之意。誠無足取。顧不婚不宦者。人猶美之。况西士

之守貞。大利于四方萬民者哉。

追念先人當循正道

天主教中。第四誠曰。孝敬父母。所謂孝敬者。生則敬而養之。死則葬而追思之。謂也。飲食者。生人之事。形骸之需。死則棄形存神。既免饑渴。何須嘉旨。試觀苾苾芬芬。一奠之後。總入生人口腹。奚曾沾及先人。特古之人。以爲子孫事死如生。事亡如存。舍此馨香俎豆。無以伸其致敬。致孝之誠。惟是禴祠蒸嘗。互舉于四時之祭焉。然又世遠則情絕。故親盡則祧。非始祖。

與有功之宗。亦不復祭。此就有位者言也。若庶人原不立廟。祭禩而已。迨後世。以爲祭之義。生于心。固無二致。而祭之禮。因時沿革。不必泥于成典也。於是古者四民祭。不迨祖。後則凡彼所能憶者。皆合祀之。雖非古典。尚存一本遞承之意也。古者有廟祭。而無墓祭。故寒食野祭。歐陽氏非之。然瞻彼松柏。不免露霜之感。則後之掃墓而獻。雖非古典。尚存逝不可追之恫也。古者有四時之祭。而無生辰諱日之祭。後則謂生之辰。係祖父得有其身之日。死之日。乃子孫抱痛

終天之日。手澤猶新。烏能已乎。此雖非古典。尚存樂與哀半之念也。古者冠婚告廟而不設祭。後則加爾元服。燕爾新婚。始祖以下。俱奠焉。此雖非古典。尚亦存追遠之心也。若古者祭祀。子弟爲尸。後則易之以像。無非因親已不在。而曲爲像。以如見其在也。總之祀先者。報也。非養也。蓋爲人後者之孝思也。非供已死者之日用也。至今世。自餓鬼之說興。始有祖宗餒而之惑。自妖卜之說興。始有先人索祀之疑。自閻王之說興。始有冥司賂賄之訛。而且親死。則祈救無君。

之佛。超度。則資功悖德之僧。念阿彌。謂黃阡白串。堪作地府金銀。焚關牒。稱片楮。隻封。便是冥途憑據。立主位。信形魄歸土。而神魂依于木主也。則今之所謂祭者。其義既謬。其禮已非。故聖教將今之殯葬。追薦所用之禮。凡謬妄不根者。概禁絕之。然聖教于已亡之先人。並非無致敬致孝之禮也。蓋有誦禱文。舉彌撒。洒聖水。上乳香等禮。以祈天主。拯拔先靈而登之于福天也。故曰。追念先人之正道。其惟聖教乎。

世俗鬼神皆非

昔先王既類於上帝。至于群神亦徧。山川亦望。春有祈。秋有報。懸揣先王類望之意。上帝者。群神之主。群神者。上帝之臣。於以嘆後人失其意而蔑其義也。今以聖學按之。天主制宰萬物。原命諸神分司天下矣。九重諸天。各有運動之神焉。山川日月。亦有駕馭之神焉。萬國九州。各有一神護守之。府州等處。亦有各神護守之。又有護守帝王仕宦者。并有護守群黎百姓者。是皆制宰之權衡也。故春有祈。亦祈之上主。秋有報。亦歸功于造物。夫人受上主之恩。固大。受諸神

保守之恩亦不少。但諸神悉受命于上主。以司下土人物。則其功仍歸之主也。况其榮福本來充足。雖施大功于人。絕無所冀望於人。但令人覩茲三光河嶽之麗奠。百穀之繁植。因而感謝大主。信愛謙事。則諸神之心。卽不啻大慰矣。乃今世悉以道家所僞撰。爲鬼神本職而禮之。城隍當境。無非已死之前人。玉帝天師。悉由世人之贈號。歲時祭謝。捏天地水府爲三官。侍從神祇。拉馬趙溫關爲四將。蓋世俗之鬼神。已非先王所祀之神祇矣。古者能除兇暴。則稱之救災。

患則述之。有功德于民。則傳之。今則秦政項籍。竟有血食之祀。妬女五通。亦立春秋之祀。吳魏而祀雲長。荆楚而祀子胥。何謂也哉。然徒傳述其人而稱之。猶可也。乃禍福惟彼是求焉。予奪惟彼是畏焉。舉降殃降祥之權。悉歸于愚民所豎之土木。因而燒楮焚香。朔望有拜祈之禮。陳籩設豆。春秋具禮祀之文。或者常念阿彌。冀夫超度。或者連年齋素。惑於輪迴。諂媚妄求。不勝誅也。甚至私自黜陟。升降任意。裝束遨遊。一如人事。顛倒悖理。了無顧忌。總之未嘗格致。見人

間事體如此。想鬼神亦當然耳。嗚呼。梵宮霄峙。道觀
彌山野寺。淫祠幾徧海內。幸上主至仁無際。不卽刑
滅。竟不知愈大寬之于今日者。愈重僇之于死後也。
嗟今之人。不亦大愚矣哉。

氣質所以不齊

或問人生智愚強弱。良暴壽夭。判然不齊。其性有善
惡乎。天主有厚薄其間乎。抑氣化之自然。雖造物者
亦無如之何耶。予曰。主賦之性。本來皆善。堯舜之與
桀跖。無以異也。顧所謂善者。質善耳。非德善也。性固

可以爲仁。但不得以性中有仁。而遂爲仁人。行仁則爲仁人。行不仁則爲不仁人也。性固可以爲義。但不得以性中有義。而遂爲義人。行義則爲義人。行不義則爲不義人矣。譬如一幅良楮。可以繪佳像。而拙工以繪醜像。楮不任罪。一秉好筆。可寫美字。而拙手以寫惡字。筆不任罪。人性自可爲善。凡爲惡者。人自悖性而行。非性之罪也。若夫氣質之說有三。一者父母之血氣。血氣少而清者。其子弱以智。血氣盛而強者。其子濁以愚。一者此方山川之秀。而仁智之質因之。

如江南之人。概多文秀。北土之人。概多質直也。一者教育之遲速。父師之賢不肖。境地之觀摩。習染之深淺耳。蓋稟受不齊。不過明愚勇怯之異。若爲善去惡之權。主張在心者。非氣質所能蔽。不能生而知之。獨不曰。學而知之。困而知之乎。不能安而行之。獨不曰。利而行之。勉強而行之乎。况剛明者。往往作過。愚怯者。往往不能爲大惡。卽如生質貞潔者。固美。生質好淫。而能反之于貞。則爲力雖難。爲功更大。生質溫和者。固美。生質易怒。而克之歸于和。其事更苦。其功倍

盛。此天主所以任氣化之不齊。而不強之使齊者也。故聖教稱肉身世俗。邪魔爲三仇。深爲靈魂之累。肉身卽氣質之謂也。世俗則所習之頽風。苟非卓立。難免汚染。或懼違衆受譏。聊亦苟且相和。邪魔恒以非義投入我念。但魔能誘我。不能強我。誘感在彼。主持在己。初發一念。機不係我。隨時遏除。不惟無罪。且有克己之功。故聖人之禦肉身也。不使血氣過盛。寧靜淡泊以養之。俾神靈能制嗜慾。其禦世俗也。天下非之不顧。一國非之不顧。衆濁我清。衆醉我醒。其禦邪

魔也。念吾主之五傷。畫十字呼聖號。而又時加省察。隨起隨禁。不使想成也。昔一聖人默禱。主呼之曰。爾欲我去爾惡念。使不自起乎。曰。不欲也。但祈加我戰勝之力耳。將不遇敵者。是不欲成功受賞也。故天主許魔鬼在世試煉人心。以玉成其德行焉。若開物成務之哲。訓世設教之聖。天主使其稟受。稍美于他人。非獨厚一人也。厚一人。正以厚衆人。而其于人總無厚薄也。至於壽夭。雖由主命。但寡欲善養。或可消愆。却病。洩越暴殄。或速致病夭亡。然人而善。壽固增其

德業。天亦速邀其天賞。人而惡。壽則日積愆尤。天則早受地獄。天主不以壽夭爲輕重。猶之不以貴賤貧富爲輕重也。

聖事寓奧於蹟

天主降世定教人遵行之七禮。謂之聖事之七跡。其外儀甚淺甚畧。世俗見之。不笑則異。不知此正造物玄機。非人識量所能測度。其精義。非悉通格物窮理之學。及超性達天之學者。不能盡解也。予亦聞其粗而已。今卽粗中之略提之。所謂七事者。一曰領洗。將

入教者。立于堂之外。示向者。未事天主。尙在門外人也。乃代父率之。身必以父生。茲稱代父。示向者。靈魂以罪如死。今始生矣。於是。以古之聖者。名其人。示爾名。既易矣。今之爾。非向之爾矣。當毋習于舊矣。又欲法彼所爲。更祈之。代請天主。爲我介紹也。以鹽付使食之。百物和之。以鹽則固。且有滋味。授以鹽者。示天主之訓。真切有味。而更堅其心志。俾不壞也。然後引之。跪于主前。又以油畫十字。于額。于項。于胸。于額者。開其明悟也。于項者。壯其毅任也。于胸者。正其愛欲。

也。乃俾之追悔前非。悔訖。乃受洗。其辭曰。某。我洗爾。
因父。及子。及聖神之名者。凡以水滌額時。誦此數語。
其水遂有赦人夙愆之力。示外以有形之水洗其身。
內以無形之聖祐。洗其神之夙染也。乃舉白帨以覆
之。示受洗旣訖。靈魂蠲潔。如此白帨然。顧帨欲善保。
不然則復污之矣。惟性亦猶是也。可不密爲防束乎。
又舉燭使持之。示受洗後。心性光明。如此燭然。顧燭
欲善覆。不然則風滅之矣。惟心亦猶是也。可不兢兢
保持乎。於是拜手稽首而起。天主赦人前非。專恃此

心悔改。必立領洗之禮者。一則所以別于教外之人。一則示罪惡獲宥。不恃自己之力。而全依天主之功也。二曰堅振。西土有佳木一種。生美油以塗人身。則肢體堅固。其油聖過付人。示外堅其力。而上主內固其神也。故其禮謂之堅振。領洗者。譬以發散之藥去疾。受油者。譬之服補劑也。蓋天主命之如是。不論何物。能力隨生。水遂有滌心之量。油遂有鞏性之能矣。三曰告解。入教之後。復有過惡。或言。或行。或想。則免冠跪于司教之側。悉吐所犯于其前。司教代主釋之。

而命之以補贖之事。人既獲罪。雖痛悔願改。必告解者。一欲人羞告。則必羞犯。當羞于未犯之前而不犯。不當羞于既犯之後而不告。羞犯爲慚耻。羞告爲匿非。二欲見其無護過之心。天主固無所不知。人有過而但不敢欺天主。豈謂之不自匿。惟直吐于司教之前。而絕無所隱。則直不護其過者也。凡領洗受油。告解。必先之以痛悔誓改之心。望赦之願。若無悔心者。則雖洗雖解。均未蒙赦也。凡阻于勢而不獲行二者之工。則以愛主真悔。亦能獲罪之赦矣。勢可以行而

不行。雖極悔于心。不克邀宥也。凡領洗。受油。一生止
可一舉。告解則日行之而不得也。四曰領聖體。古教
祭天主也。以羊羔。今祭天主也。以耶穌體血。所謂體
血者。耶穌受難之先一夕。眾徒咸聚。乃付麵餅而囑
之曰。汝食此卽我體也。復酌葡萄酒而授之曰。汝飲
此卽我血也。蓋萬物變化悉聽天主之命。命餅爲體。
則遂爲體矣。命酒爲血。則遂爲血矣。故今祭上主。惟
以酒麵餅二物。司教者代耶穌之位。誦其言。則餅卽
爲體。酒卽爲血。明此理而無大過。可領聖體焉。然天

主不顯其容。而隱于麵酒之形。主欲降臨愛主者之胸中。而與之相洽。使顯本像。則人必畏懼而不敢領。且吾主聖躬。無極光麗。人未升天時。固不欲令之見也。七事皆屬奧理。而此一端。尤爲深妙。須專書備論。乃曉。茲不多述。五曰臨死終傅之禮。以聖油畫五官。卽蒙天主提拔洪恩矣。六曰品級。卽教中以官師撫治人之神者。七曰婚配。凡夫婦交拜前。邀親友同詣聖堂。請掌教於大祭時。行降福焉。此七迹。乃人生升降之權衡也。不然。雖有絕倫德行。亦雖望上升矣。

神功萬不可已

有謂存心養性。所以事主。我教中誦祈瞻禮。俱屬粗迹。可不必爲。予嘗聞利西泰之說已。事主之功有二。一者。以行事仰合天主。一者。以心神默與天主晤契。行事合天主。卽存心養性之謂。而心神默契。非徒對越而已。蓋人之心。必有所寄。不寄于善。卽寄于惡。置其心于聲色貨利。則日進于邪慝。寄其心于道德仁義。則日立乎高明。天主者。道德之源。而仁義之海也。我以此心日洽焉。誠日入于善之機矣。况爲善去惡。

多恃上主寵綏。人惟自恃厥力。是以行而多蹶。誦祈者。所以乞寵綏于上主也。且誦祈之中。有爲君父祈者。則卽以動我忠君愛親之心。有爲天下萬民祈者。則卽以生我民胞物與之思。有爲我仇祈者。則卽以廓我情恕理遣之量。有爲已死祈者。則卽作我存。順沒寧之想。遇難而祈。忍則益固。堅貞之力。得意而祈。佑則隨絕。我驕溢之端。有過而祈。救則彌進。我遷善之志。而且祈。忍祈。勇祈。謙祈。勤祈。畏祈。愛祈。信祈。望當此請禱之時。卽是力行之始。則又有恭敬天主之

文。惜慕天主之文。畏懼天主之文。瞻怙天主之文。稱羨天主之文。感謝天主之文。稽首誦經之際。彌全昭事之功。夫人心所欲爲。力或不副。上主所祐。無事不得。故真心籲主。非徒見之空言。實能邀主福庇。則不出戶庭。而德曰成于己。功曰加于人矣。且天下之善。莫大于和。而不善莫大乎不和。合則情密。和則相愛。相愛則視人如己。而已所不欲。勿施于人。不合則疎。疎則不和。不和則相惡。相惡則專己自私。而枝妬殘貪。無所不起。是故有瞻禮之日。以致衆。又有聖會之

期以相萃。互相講解。勸勉效法。以合致和。和致愛。愛致種種之善。而會遇時。司教闡經談道。半語隻言。皆補助身心之藥石。遇諸主日。則思化育生成之恩。因念我卽竭力致命。不足仰答毫末。况一切誠命善事。可不守乎。遇聖人諸瞻禮日。則思彼亦人也。能自克修。成此巨績。萬世而下。敬事若茲。我獨不可猛厲前進。使盛德至善。法彼攸行乎。是故教中之規。瞻禮有單。修會有所。早有課。夕有禱。誦念有珠。總牘有經。或默想。或神領。總之息息念念。期與上主通洽。以成就

德行也。若夫習異端之作用。誦悖理之空談。匪直無功。罪難逭矣。

空中自然變化

有謂風雲雷雨。自天而降者。有謂流星彗孛。麗于天體者。至謂潤澤。則雨師之揮洒。怒號。則風伯之鼓吹。虩震。則雷公奮武。閃爍。則電母搖光。此等俚言。非特愚俗相傳。卽文人亦或仍演說之。概由不窮物理所致。夫空中變化。乃格致學中之一端。有專書備論。今則聊述大旨。自地而上。二百六十里有奇。爲氣域。氣

域而上。至于月天。爲元火之界。界中不容物入。氣域分爲三際。近地者爲和際。中爲冷際。近火者爲熱際。種種變化。悉在氣中。故登高山之巔。則雷雨風雲。咸出其下。水火土爲天行所吸。則同騰聚于氣中。鬱然成雲。上達冷際。受冷所化。則散爲雨。當其未散。火在于中。爲氣水所束。不得走出。則殷殷有聲。及于得路。破裂而走。遂成大响。而電正其光之奔飛者也。若土之升。亦在氣中。爲奔火所煉。遂成霹靂楔。同電降地。卽拾則可得之。入土久。仍化爲土矣。若盛夏炎熱。水

氣乾不能升。火土獨上。勢重則久凝。爲孛爲彗。勢輕則奔散。而爲流星焉。火既破氣而出。成爲雷霆。若火已盡。則不復風。或火勢盛。未得及土。橫行地上。則往風雷交作。其有風而不雨者。火之升也。不受水迫。卽返下土。爲氣遏抑。未獲遽達。遂橫奔動氣。而爲風耳。水上而火不上。則有雨而無風。火上而水不上。則有風而無雨。火土並蒸。則或風止而繼之以雨。或甚而風以散之。或甚則風雨並作。總視其勢之先後盛衰焉。水土並上。土多于水。則爲霧。有霧不收。則成雨。

者。水氣亦勝也。土自獨上。奔散之際。則成黃霾晝晦。或與火俱。則隨風而至。水升僅到氣之和際。則爲雨。爲露。入于冷際。遂成霜雪。入冷再深。則爲雹。雹之大。小。視入淺深。然雹在夏。而冬反無者。夏時炎烈。上升之勢。銳能直入冷之最深處。故結而爲雹。冬則上升之勢。緩僅及冷際。遂爲霜雪也。故夏雲直銳而狹。俄頃之內。便可成澤。至于隔隴。或分晴雨。冬雲需緩而廣。非經數日。雲氣不成。及其成雨。施被亦遠。種種變化。悉出自然。而其所從。咸因天德日光所照。能吸引。

下地之四元。惟月亦然。如離于箕。則多風。離于畢。則多雨。諸星之德。各能施效。顧七政經星。性情不齊。有阻有悖之勢。同度相值。則能阻其本效。使不得遂。故天文之家。推此年之纏度。卽可知此年之水旱。茲皆天地固然之理矣。惟制造天地之主。可以易固然之運。有當致乾溢而降之福澤者。有本屬調順而施之災罰者。如今人悞解雲從龍之說。妄疑雲雨。係彼所致。不知所謂龍者。乃天上之星名也。非特水中鱗蟲之長也。化育之權。豈有托之畜類者哉。乃一遇水旱。

則向土神而祝之。取蝦蟆魚鱉而祀之。僧人誦經。道士步罡。向魑魅而祈禱。禱之不應。不能自悟其誤。反以爲心有未誠。術有未盡。而多方作法。至于一步一稽首。乞憐蛇蟲。幸自然之運至。則又歸功于彼。而祭之謝之。此不但可痛恨。實可大笑。使傳于他方。而曰。我縉紳大夫。至於庶人。舉動如此。不知視我爲何等也。或又曰。雷霆擊人。爲天主之罰乎。曰。人必有死。但不無故而死。必有所以致死之由。或死于疾病。或死于殺傷。則亦有水淹而死者。火焚而死者。死于雷。與

死于水火。原無以異。特以其自空轟轟而下。遂若獨此爲非常之罰耳。試觀雷霆所擊。或在無罪之孩童。或在不靈之木石。豈必死于雷者。惡于水火哉。若人之死生。不拘何等。俱出天主之命。被雷所擊。豈非有天主之意乎。

魔鬼能爲變幻

魔鬼者。天主所造。本與天神同類。其巨露際弗爾。乃諸神中最尊鉅者。恃其尊鉅。傲慢背主。罰而爲魔。而其黨亦與之俱墮。已。然雖受地獄之苦。其本性之智

力仍在。遊行地上。網羅萬民。其謀甚深。其計甚巧。其能甚大。其布置甚多方。使人不着于此。則觸于彼。蓋緣魔既失升天之望。因妬人類之能升。合力畢攻。阻絕天路。諸所作爲。無非使人心想顛倒迷惑。背主積罪。永墮冥獄。與已同受無疆之苦耳。是故或煽人血氣。使淫念勃然。敗倫拂性。或動人殺心。使剛愎忿怒。爭鬪傷殘。或因狡黠之士。鼓其神思。俾各設教門。或因好修之士。亂其明悟。俾北適南轅。或假卜筮以呈音。或托五行以示幻。或以符咒與人。使之呼召往來。

或以邪術衛人。使之吞針浴火。或托于無知之物。使石言木徙。或依于禽獸之身。使豕立人啼。或藏神佛像內。能動能言。宣洩微隱。或憑巫覡妖身。測福測禍。妄言未來。或于衆僧誦經之場。俾甘露時來。天花亂墜。或于羽流設醮之壇。俾玄鶴翔舞。彩雲竚凝。或入赤子之口。自言前世事緣。使人信因果之非誣。或入畜類之中。自道我某家子。俾人惑輪迴之變化。或于夢寐之際。大肆誘惑。或因心志有疑。乘機翻弄。或生風鼓浪。使人祭祀請祈。或現形傳話。使人心驚膽裂。

或假祖宗之像。以示子孫。或假仙佛之號。以遊人世。與之相狎。或取他人財物以富之。如今之五通。受其秘密。能使生平所惡者見災。如妖僧之咒術。變幻萬端。言之不盡。雖緣魔搆。半以人訛。一則文人墨士。喜造瑋言竒論。聳駭見聞。一則衲子羽流。自撰殊踪怪跡。証彼教法。一則無識愚民。偶得影响一言。浪說傳播。蓋古今來所載無窮異事。真者十無一二。僞者十有八九。源流旣明。物理一格。舉世惑之而不能決者。我可斷其由然者矣。

輕棄世福爲先

客有誚予者。謂禍福予奪。出于天主。何不使事之者。蒙富貴福澤耶。余曰。子以爲事天主者。將求富貴利達耶。殊不然矣。夫世福者。善人處之。惡人亦處之。非天主所以報我也。且爲善者。必先正其志。志在富貴利達。則立念已差。所爲之善。悉自私自利之情耳。烏足尙哉。夫奉事真主。豈遂得位乎。豈遂多財乎。豈遂吉祥如意乎。豈遂聲名騰達乎。似與世俗之人。無以大異。不知此世者。冬日也。後世則春日矣。冬日百卉

凋零。草木之有生意者。與無生意者。總不可辨。迨于
春至。則生意具者。萌芽滋長。無者不過砍伐爲薪。以
供飀炊而已。人在世時。事天主者。與不事天主者。亦
無以辨。至于既死。一者登化光之天。一者付冥阱之
爨已。且世福之念。最壞人心。阻喪善德。必富而後可
則。捨克攘奪。不足以厭其心。必貴而後可。則倖進僭
竊。無以激其耻。必得名而後可。則欺世誣民。不足以
竟其術。其未得之也。有羨心。其既得之也。有傲心。得
之而恐其復失也。有畏心。不幸而一旦喪之也。有悲

心終其身爲四心所奪。尙有清虛之衷以趨道哉。而貪想所使。無事不爲。或冀蔭庇于五行風水。或占終身于星相夢卜。或乞福佑于野廟天星。種種竒狀癡態。皆世福一念肇之矣。夫身處巍峩之勢。何如神靈不屈于物欲之足貴也。家藏陶頓之饒。何如中心充足乎道義之爲富也。外有赫赫之譽。何如隱微爲上主鑑歆之可悅也。古之君子。恒恐以權勢在己。生其驕態。其履高位也。如登危梯焉。恒恐以積貯過多。府蓄辜怨。其處富厚也。如居叢刺焉。恒恐以諛聞動衆。

喪我真德。其避虛譽也。如避盜賊焉。故有辭爵棄位。遁世潔修者。有散巨資于人。以儉約澹泊終其身者。有埋名剗跡。闔然不章。不露者。彼視一切美利榮華。威聲勢耀。庸夫俗子。艷心咋舌者。如草上露。日出遂晞。如枝上花。朝榮夕隕。如鏡中像。一掩不見。如夢中境。一醒輒空。得不得。何足以係其心與。乃以不獲富貴吉祥。爲聖教無效驗。洵鄙人之識也哉。

受苦爲大吉祥

異端妄言以語衆曰。求官位。得官位。求男女。得男女。

求長壽。得長壽。今誦其經而祈請者衆矣。試問果得其所求否。乃不悟其妄。終身信之。何也。若聖教則異是。彼官位男女長壽。搦于上主之手。求之良易。上主亦不之吝。然而學道之士。不之求也。求勝世禍。不致失望。求賜愛貧之德。求賜一切忍受患難。求賜輕忽世界。若已死亡。不戀在世虛妄之福。故曰窘難者。益德之資。又曰。爲義而被窘難者。乃真福。又曰。市天國之價。艱難而已。苦患礪德。如他山之石。礪玉也。今夫金入于火。雖有焚灼之形。然經煅煉而益精矣。水過

于峽。雖有束縛之勢。然經抑遏而益迅矣。吾生之頓挫險阻。亦融性之火。騰德之峽也。自古在昔。成大德者。恒不辭苦。其甚者。委命証道。或剝膚鑿眼。或火炙鼎烹。其或倒懸橫截。或碎體分肢。其次亦被撻被貶。被辱被訕。又其次奔走勞疲。冒犯寒暑。甘受饑渴。衝歷風波。至有一生慶譽。不逢拂意之遭。則遂懼天主棄我也。乃自取苦焉。或避家野處。或辭世却華。或露宿仰顛。或赤日跪禱。或披棕束棘。或揮鞭繩撻。其于一切苦患。不惟不去之。且受之。不惟受之。且索之。故

凡疾病坎坷。貧賤困頓。譏侮勞役。種種不順之境。悉以爲上主玉成我德之具。欣然忍納。而遇人之非道加我者。亦不生報復心。惟益勵我德也。夫世上萬端罪惡。皆自厭苦始。萬端德行。皆自茹苦始。厭苦則有非分之願。當其得之。則有恣睢之行。若使不得。日抱怨望之心。恣睢則爲淫。爲奢。爲驕。爲逸。怨望則爲妬。爲爭。爲竊。爲亂。苟能茹苦。雖湯火白刃。可前蹈也。驚濤絕澗。可履冒也。監門臣虜。可安作也。凍饑勞頓。可寧耐也。若而人者。臨難不避。見利不動。立朝則直。臨

陣則勇。財不苟取。名不苟得。富貴不淫。貧賤不移。居上不驕。爲下不諂。孟子不云乎。天將降大任於是人。必先苦其心志。云云。增益其所不能。夫升九天之上。侍大主之側。友神聖之群。享無窮之福。所謂大任。孰過於是。而可不經苦煉。泰然安受也哉。故曰。爲主而死者。乃是常生。爲主而貧者。乃是常裕。爲主而失位者。乃是常貴。爲主而流竄者。乃是得其本鄉。爲主而勞苦者。乃是常安樂。世亦有肯受苦之人。而所爲一非。竟等無用。吾甚憫之。而思有以救之也。天之生斯

民也衆矣。生民悉大父之子。則雖非我昆季者。而觸目所覩。不達者十九。予用不勝悲惋。而撫襟欲絕也。或曰。子何言之過也。普世豈無善人哉。而皆下墮耶。曰。試令諸人捫心自思。生平果無一過失否。果有過失而哀悔洗滌否。縱敢于人前大言無過者。必不敢對天主言無過也。若是。則吾言豈過哉。人生不能無過。過而不改。罪遂著矣。猶身不能無病。病不求醫。病遂危矣。或曰。舍此間相傳之道。而取外夷新立之說。以救過。不亦悖乎。曰。方家之藥。強半自海外載至者。

苟可與病相濟。豈曰不生我土而不用乎。苟可與過相補。豈曰不出吾邦而不取乎。地有華夷。天無彼此。庶民相見。則曰子某郡人也。我某郡人也。自帝王觀之。咸屬統蒞之百姓矣。子不操帝王之心。而存庶民之見。宜乎以地自隘。不以天自廣也。或曰夷之一字。終難消受。曰大舜亦消得東夷二字。大禹亦消得羗字。由余亦消得一戎字。所謂夷者。特以地遠言耳。不然。則以聲名文物自矜耳。如徒取聲名文物。則後世之紛華靡麗。豈勝于羲農之不衫不履。娼優之珠玉。

錦繡豈過于孝弟力田鄙薄無儀哉。且如吾吳越之地。昔未嘗入中國版圖也。被髮文身。昔未嘗衣冠文物也。至于文明極盛。豈得亦謂之蠻邦而不重哉。况所稱大西歐邏巴者。文章學問。規模制作。原不異吾土也。輦轂幾旬。地之華也。千萬里外。地之夷也。克認真主。修身慎行。心之華也。迷失原本。恣行不義。心之夷也。不以心辨。而以地辨。恐所謂謹辨者。不在是也。若曰。界限截然。則雖兄弟。既分之財。猶不得侵。而况于他國哉。若泛溟九萬者。非特心不利我土地。并其

勢不能代此居守也。予觀西土之居于此者。無求于人。不競于物。世人往往恨妬譏訕。甚至欲擊欲殺焉。則以所傳之道。所晰之理。多觸人隱慝耳。世俗所甚信者老佛。而毅然斥之。則拂人情矣。世俗所重者淫祀。而毅然斥之。則拂人情矣。世俗所甚嗜者美色。至富貴之子。姬媵偏多。狡童之好。更過家室。而毅然斥之。則拂人情矣。嗚呼。俗疾旣深。施以對疾之劑。固宜有瞑眩之勢。然雖至于欲擊且殺。不能不加服焉者。則以教人事主。大原所在。良知有不容泯滅處。而論

人于善。平旦好惡。有未盡。猶亡故耳。或曰。以子之位卑而力微也。乃欲胥天下而易之。不亦難乎。曰。苟得上主之意。位雖卑。力雖微。自可以有所爲。不得上主之意。縱位高力大者。恐不能遂其志也。夫天主轉移人心甚易。然或善或惡。且聽之人而不強。吾安敢以強天下。但夙志所矢。則願人人同認大父。得返本鄉。盡我昆弟之職耳。願天地之內。善人雖多。亦自有不可化誨之流。使無此等。則地獄爲空設矣。地獄不虛設。此等固必有也。昔吾等主耶穌有言。以善語陳惡。

人前。猶以珍寶置豕前。必踐污之。主教之珍寶。吾豈敢謂世且必踐污也。而不陳哉。然予則用是甚悲也。悲夫。種種之理。極明之。而極能言之。而猶不能悉體而盡行之也。

天地之終有期

乾坤必有盡期。天主降世時。所親口詳論。又先知聖人。預記天主降世。生于聖母之童身。及無數超性事跡。俱一一驗證。則以終盡之期。定然無謬也。所謂天地盡者。非其形體毀滅。歸于無有。乃運動止。功用隱。

而化育息也。宇宙非一大試院乎。生人非入試士子乎。人類之生既畢。如試事已竣。墻雖不折毀。而種種供給之具。可以不復設矣。有謂天地一周。如人一生。開闢之初。是爲天地孩時。洪水之世。是謂幼時。耶穌降生。是爲壯時。過此則爲耆爲頽。而將抵于終矣。夫降生之距開闢。僅五千餘年耳。豈天地之運已過半乎。有謂經星既周。爲天地盡期。蓋天主既生此星。使之運行。豈有未周而卽已之理。夫經星以七十年爲一度。二萬五千餘歲而一周耳。則今日天地之運。僅

得四分之一耳。此二說皆以人見推測之論。惟耶穌云。天地之終如霹靂而至。雖在天之神。不識其時。故經不載其期。而但載其將終之兆。終期將至。當是時。普天之下。不論人物蠻夷之國。咸惟天主一教是從。乃有僞基利斯生于此。依魔之力。能作靈異。不數年而踪跡遍天下。凡教人以此委命者。更多于千萬年以來致命之士也。此人旋被天神擊死。然後災患大起。天運違序。三光失明。空中恒震。响過雷霆。火矛火劍。怪異叠興。家國並鬪。疫厲並行。海濤沸濫。漂溺人

物。全地大震。山陵城郭宮室悉皆崩裂。江河橫行。人
靡所棲。惟願早亡。蓋不復可以爲人間世矣。至于末
日。天降大火。生民動植咸殄無遺。天水不行。地永不
生。凡滓濁之氣。經火煅煉。悉入地獄。茲時地體澄徹
如玻璃。月光如日。日光更倍於今。天星麗耀。皆過舊
時。夫乾坤本爲人設。此時宇宙之內。既不生人。則天
可廢滅。然而存之。且加美焉。欲升天諸人。睹茲而彌
感大恩也。或曰。天地旣終之後。或者復起。化育如初。
開闢時乎。或於此天之外。更造天地。以生育人物乎。

曰。天旣恆寂。地旣晶明。化育之功。從何復起。蓋天主
全能。造天堂廣大之美好無量。有不可數計之聖人。
不可指限之天神。能事已足。何必更爲哉。



拯世畧說終

